

四庫全書

集部

欽定四庫全書

集部

鄱陽集卷二

詳校官庶吉士臣范逢恩

檢討臣何思鈞覆勘

總校官編修臣王熙緒

校對官助教臣卜維吉

謄錄監生臣沈瑞錦

欽定四庫全書

集部三

鄱陽集

別集類二 宋

提要

臣等謹案鄱陽集十三卷宋彭汝礪撰汝礪字器資饒州鄱陽人治平二年舉進士第一
歷官權吏部尚書出知江州事跡具宋史本
傳東都事畧載所著易義詩義奏議詩文五
十卷宋史藝文志鄱陽集四十卷今易義詩

義已不傳此本乃其詩集亦止十二卷非其
完帙又編次錯互如古體中悞入律詩一首
律詩中悞入古體一首武岡驛一首有錄無
書寄佛印一首前後兩見頗多複混殆其本
集久佚後人掇拾殘賸復為此編故其淆雜
如此歟史稱汝礪詞命雅正有古人風而詩
筆亦諧婉可諷明瞿佑歸田詩話嘗極推其
情致纏綿王士禎居易錄亦引其梅花詩中

瀟湘此日堪腸隨處幽香著莫人之句以証
朱淑真詞耶律楚材詩內著莫二字之所出
在北宋諸人之中固亦褻然一作手矣張舜
民畫墁錄載於臨歿作偈有從今以後不打
這鼓之語蓋其學實出於禪故集中多與僧
往還酬答之作然汝礪立朝侃直風節凜然
凡所論諫皆關國是其晚耽禪悅蓋亦自行
其所得故不必以一格繩人遽為汝礪病也

乾隆四十六年六月恭校上

總纂官

臣紀昀 陸錫熊

臣孫穀

總校官

臣

陸費

墀

欽定四庫全書

鄱陽集卷一

宋

彭汝礪撰

古詩

忠孝圖

并序

燕滁州雍為忠孝圖以遺淝守宋公選公曰
此皆古人大節吾昔聞之矣傳於編簡之紛
紛不如見諸繪畫之昭昭目視心維可以動
蕩人之志氣以施之事業滁州之圖蓋不為

小補俾某圖之學宮千乘先生倪天隱為之
序深悼後世之臣子蹈邪趨惡負罔極之恩
而不知報圖成某與諸生顧而言曰君臣之
義父子之愛出天性之自然至於義窮愛弛
而甘心亂賊之名情奪之也嗚呼今為子而
思其所以生育為臣而思其所以安榮推而
極之則古人之心可以坐照禽獸或知有養
奴僕有為其主死者況於士耶子曰未之思

也夫何遠之有

君親等乾坤恩義俱罔極浮生一毫髮盡出覆載力我
思古之人節義有遺則以身託萬事糜殞終無嗇名教
落編簡不與日月蝕世薄道亦微綱常墮荆棘想像不
可追徘徊意悽惻燕卿真士雄繪素見顏色謀惟引深
思摩揣窮多識金朱寵純懿斧鉞誅姦慝欲將春秋法
轉徙示九域肥陵泮宮庭收拾在四壁千年土中身精
神回翰墨崢嶸列星辰奴隸生歎息已死疑可求欲語

金匱要略卷一
嗟復默清風颯冰霜直氣森劍戟富貴喜圖畫蓄聚窮
千億丹青彼雖工龜鑒吾自得願言同此心論世師盛
德當使忠孝風自家刑邦國

宿萬孝子家

并序

萬敬儒肥陵人其家同居數世親死廬墓不
歸刺指寫佛經數百卷太守表之詔旌其門
昔人迴車勝母里今我枉步孝子家天寒日暮林谷暗
回旋道路甘泥沙高臺隆隆起門戶松檜夾逕清陰斜

縣官抱燭讀碑字夜闌相視生咨嗟今我為詩語萬氏
萬事成難敗之易爾家承承今幾年勉旃無為先世累

七門堰

并序

予為合肥職官始按事龍舒出邑之西北門
觀所謂烏陽腴牘七門三堰問耆老求疏治
之始漠然無能知者蓋其所從來遠矣晚得劉
放貢父所為廟碑乃知始於羹頡候劉仲而劉馥
實繼之因自歎曰古人之所為迺能如此劉仲

遭際幸會以得爵位傳所言惟力于耕產耳馥
誠竒士然亦無他稱道而其規畫已足以休福元
元於無窮後世議論太高而亡其實視民事藐
然矣萬一有為則利常不勝其弊而民卒窮
困以死而不救也嗟夫

古人材大心亦公憂樂每與天下同謀功慮事不草草
欲與天地為無窮我來舒城道三堰行看利入東南徧
漁樵處處樂太平稻粱歲歲收餘羨江淮旱澇相綴聯

舒城獨自為豐年人知今日樂其土不知古人為爾天
二劉未必真奇偉謀慮及民廼如此俗儒文多實已亡
洋洋大論言義皇心欲為功害輒勝醫庸未足平膏肓
紛紛予亦何為者愛古傷今空涕洒題詩倚立寄西風
不知材力非騷雅

金星硯行

星出雲之端石在溪之潯天上地下相絕幾百千萬里
硯中安得有星點點明如金既非瑕掩瑜又似徽在琴

我疑星之飛流運動或不居精采誤落黥流深不然神
靈憫惻學士久濡滯故借光景資清吟或有感此理杳
默難推尋君不見號山之石團團有桂在中象圓月又
不見廬江之石扶踈有木相樛為寒林無重言但置寒
窗筆札往古研於今大剛無睢睢至明無陰陰君也能
如此是真金星硯之知音

選仙圖

自昔黃老言無為謬說汗漫為神仙古人力探源未塞

今世復用根尤堅仙經自是物外來畫圖誰向人間傳
碧油堂印始等差洞天福地分後先勢窮或滯艷都幽
彩勝即上崑崙顛得失無端見掌握勝負有勢生回旋
終朝相視何為哉萬事不齊俱偶然物雖無庸意甚遠
為子採取題詩篇

李卿惠太平州學詩

李侯昔也治當塗作學以遺當塗民謠言散落在樵牧
事迹收拾歸瑤珉高文大字比珠玉長與後世為奇珍

我因李侯念往初黨庠遂序明人倫井田變更萬事廢
士林泣血悲孤秦今人思慮到本原願見風俗終還醇
嘗聞君子天下志一視萬物無踈親侯來我邦嗣其兄
愛惜不後當塗人即視學宮動風采復尊師席尸陶鈞
道路尚思前召父閭閻敢忘小馮君

瓦鼓

客遊南昌歸歸我四瓦鼓

瓦鼓自新建令仲文得之

渾完自甄冶質

朴排罌甌觸之散遺聲往往中商羽聲來殆天得不用

詢有瞽野心愛不徹取之置林宇竹梢奏清風似喜佳
物伍岸巾策筇杖共爾蠲毒暑世浮見此拙坐覺幽興
聚丹楹惜異時蕢桴想淳古君年比予少能亦珍此否

寄佛印禪師

遣奴持書問雲居我今持節行匡廬請服磨衲大牛車
來飯香積及雕胡舍施琥珀及珊瑚滄海徑寸之明珠
師應問吾今何如謂方據案治文書較量貴賤調盈虛
擒取猾吏如捕狐夜涼飲酒一百壺醉視萬物渾錨銖

雲居若言太粗疎謂我寄聲謝云吁

去年行建昌作詩招雲居元禪師近過南康不

見用前韻馳寄

雕金間壁雲中居卧龍更有文公廬門前不設羊牛車
誰將虎鬚跋狼胡寶林環繞千珊瑚中間一點摩尼珠
游戲樂說心如如諸方傳錄為奇書愛師談實非空虛
生決定信無疑狐裘裹洞徹如水壺輕重已自分錙銖
咫尺祇恨相逢疎各自有口能無吁

禪師和予詩云有口吃飯誰能吁

答趙溫甫見謝茶甌韻

我昔曾涉昌江濱故人指我觀陶鈞
厖眉老匠矜捷手為我百轉雕輿輪
鐫刻畫走風雨須臾萬態增鮮新
盤龍飛鳳滿日月細花密葉生瑤珉
輕浮兒女愛奇崛舟浮輦運傾金銀
我孟不野亦不文渾然美璞含天真
光沉未入世人愛德潔誠為天下珍
竭來東江欲學古喜聽英傑參吾倫
謹持清白與子共敢因泥土邀仁恩
空言見復非所欲再拜謝子之慇懃

雪夜飲分題得雪字

顛風夜號花木折平明堦前三尺雪誰家羌笛落早梅
中夜南樓對明月苦寒侵人毛髮縮厭厭夜飲腸內熱
公才奔放欲萬里應恨低徊受羈紲一巢安穩身自在
生涯却羨鴈鳩拙人生所值俱所樂萬事悠悠無可說
偶有名酒須盡醉醉輒題詩如靖節君不見萬卒征南
凱未旋戎衣雖厚冷如鐵

和深之飲字

窮陰方欲歸故故作凝凜乾坤幾日雪晝作宵還甚寒
威鎮氛沴和氣生豐稔君子有酒食健啖亦豪飲齏鹽
本吾味笑此已多品芬芳臭如蘭爛漫文似錦夜闌燭
花低更轉鳥聲噤私飲樂已湛情話言尤審駑才負荷
重終夕無安寢樓頭鐘幾聲輾轉屢歌枕

和亶甫夜字

雪輕不自持風急更相借仙人集蓬島鴻鵠雲中下飛
騰障空虛細碎穿隙罅光明入幽室晃耀不知夜苦寒

為公飲酒盡解貂貲盤蔬起鄉思披綿問鶩鮓浮生夙
何緣今昔同官舍才調稍迫促每羨公優暇草玄入幽
微曾不解嘲罵文衡委輕重事亦宗伯亞我愚實未稱
得友還自詫兩驂萬里心雙壁連城價塵土難淹留雲
霄看高跨

和執中游山四詩

谷隱寺

谷隱多牡丹一花百十葉一根出一切一切一根攝愛

君看花處立悟恒沙劫其誰知此意祇有花間蝶

又

樓閣倚天外鐘梵落人間俗客有時去野僧長日間白
雲何所往飛鳥未能還一望輒一嘆令人唯厚顏

峴山

甘棠如衆木峴首如衆山燕人愛召公公去不忍攀襄
陽思叔子墮淚濕孱顏至今山外溪日夜波瀾翻如公

章貢祠亦在山水間

執中治虔
郡立生祠

高陽池

三年南雍居十

一作五

至高陽池魚鳥如故人相忘不相

疑但持青蓮葉不倒白接羅我與之子游何似山公時

內鄉山中

野人住山中不見山色好我行久塵土窺覽慰懷抱禹
稷不乏人翻馬憶商皓使我有以食甘于此山老

又

靜喧豈殊途能靜理亦好所以見山色愛之置懷抱攬

鏡照鬚髮已如霜雪皓吾方與神游未肯塵土老

寄葉法曹

叅軍琢玉為天性靈臺一點秋江靜少年勤苦取富貴
不知勤苦今為病世人喜邪疾中正愛君與物終無競
園碁坐爭百局勝雕弓力挽六鈞勁碁子勞神弓力硬
此圖養疾俱非令作詩勸君今勿更詩書自足資游泳
與室重簾鎖幽徑我不見君心恹恹疾病勿憂有天命
愷悌君子神所慶

送皇甫法曹

始予來肥陵問士得皇甫

皇甫子仁
吾同年

經年在閭巷不肯

出公府樽俎獻酬間為之賦翹楚今上襄陽官拙詩愧
兼取襄陽真名區碑碣字多古能因東南風取以寄予
否

寄友人

漢上近多雨江頭應好風想君當此時掛席隨孤鴻翔
龍壓大浪盡鷗凌長空男子四方志生時射桑蓬爾來

何遲遲吾憂祇忡忡
安得百頃田稍隣五老峰
早賦歸去來同為採芝翁

和君時弟見貽一首

鳬短非不足鶴長非有餘
太山逮毫芒其理固一如
君才乃驛驢行矣無踟躕
萬里不加鞭日力復有舒
豈如老鈍馬寸進徒渠渠
低頭戀棧豆時復仰天噓
徊徨槽櫪間不用論智愚
惟中可以休吾與子歸歟

送范侍郎歸許昌一首

四言

鳳鳥踴踴其羽儀儀其集伊何梧桐之枝鴻飛冥冥其
翼差差其止伊何清泠之池朝廷于公夫豈不知國有
大疑爰度爰咨公雖家居如在廟堂國之大經論討靡

忘

公在仁宗時數論尺度是非去年朝廷修
樂公亦預議今雖家居然討論猶不廢

徐徐公車

在汴之郊薄言追之以永今朝汎汎公舟在河之陰薄
言維之以慰我心公賜我言我斯藏之何以報之羔羊
素絲秉德不遺公飲我酒我斯酬之何以祝之秀髮龐
眉受福無期

讀史

婁敬脫輓輅獨建金城安韓信出羈旅遽上將軍壇謀
出萬乘驚名飛百夫歎丈夫松桂姿直氣虹霓蟠得時
樹功業未謝婁與韓

管仲有老母

王陽為孝子王尊未能非管仲有老母鮑叔獨能知同
途不同行亦各有所思今或有斯人執鞭吾不辭

暴雨

雲如驚瀾如潑墨萬竅怒號四山黑電母搖睛嚇風伯
疾雷怒張坤軸側雨如河傾如雨石上山下山泉動脈
石漂木拔崖裂圻高原立脚成大澤古寺顛前後岡逼
瓦腐椽折破無壁泥佛露頭水浸

一作露

臆苔錢藤蔓生

金碧背堂衆流如箭激挾氣急欲投間隙衣製脚芒看
溝減有惻丞徒老荊棘荷戈與父甲不釋中夕愁居晝
艱食我今乃敢求安席問閭人家水沒極壯夫浮汨老
者溺高占鳥巢據援杖可憐欲走無羽翮我起熟視惟

歎息斷檠棲直在簷額雞飛犬跳上屋脊蛟黿睥睨迷
所宅乾坤欲晴但頃刻廣庭泥深猶數尺大浪如銀沸
阡陌萬馬相踉蹌相擊窮民欲炊無釜鬲蚯蚓在堂魚
在闕兒童捕魚不知戚溪南不能過溪北跬步如越與
胡隔溺者漫一作汗不見蹤跡東村西村哭聲塞手援不

能淚沾臆掩齒雖欲終何益天理吁嗟杳難測惇獨無
辜不愛惜葬填溪魚瘞砂礫乃能屈折容盜賊鑿險開
深聽藏匿不以血膏鋒鏑皇天無情禍福直昔也昭

昭今也惑我歌且謠寫悲惻竹林一夜生秋色

和執中游山

我我楚山前屹屹樊堞後汗漫清漢左蜿蜒大堤右雷
霆沸波瀾龍虎卧岡阜春風無偏陂潤澤到藜莠日月
有底急忽忽似奔走樂哉城南游矧復得智叟橫踰路
東頭縱踏山北口逶迤陟欽釜莽蒼度林藪巍亭立青
冥隱几見十部崖石險欲落參差露妍醜沉深開殿閣
闕穴得園臼尚或埋泥塗誰能斬新樵

壬辰同論
主僧洗石法海

惟我汎禪關與君叩清泉給醍醐一飲失塵垢丹鳳杳

不來瞻想更搔

一作回

首潭潭谷中寺花木照堂坳樓閣

守岌堯敔危貼星斗白雲雜香霧終日在戶牖有沼旱

不枯金蓮豈凡偶不見白馬至似聞蒼龍吼一雨作豐

年懽愉逮雞狗稅車高陽池遺事問黃耆嘆息當世士

所懷自非苟方醉白接離寧貴朱組綬拭目墮淚碑排

徊想忠厚河內借冠恂南陽祠杜母彼惟一純誠名等

天地久愛君所志遠堯舜望高后談經破小辯獨自持

網紐德愛在章貢甘棠不枯朽

執中治虔郡立生祠

邇迴久荆楚

白髮嗟未偶軒昂更自拔怵惕匪人咎寧甘凍飢死不
一變厥守吾惟人間世所遇皆所授生死等夢幻可能
憬然否譬猶二人奕日夜競勝負紛紛置黑白畢竟一
何有但願山水盡作杯中酒時時與君醉獨與造化
友忠臣不忘君不問在畎畝

次韻堯民同年

飛雪鱸長鯨浮蛆醖新酒故人不我過絕壁頻回首北

尚無斷絕參錯紛燕豆觸目事斬新愴懷治平舊龍飛
第一榜四百如蘭友勁氣沮金石高文爛星斗我衰也
久矣彫落幾無有未去真厚顏欲歸猶掣肘盤根發餘
刃想見敏捷手江河被郭郭雲霧生戶牖碩瞻良集易
嘆息幽期後興到詩輒成吾窮久箝口

答同舍遊凝祥池

仙宮神靈之所宅樓閣倚天一十尺先生好游猶挾冊
藜莧不慙吾鼎食凝祥池頭三月春腰金騎犢多貴人

天邊五岳烟霞濶海上三山雨露新
蛺蝶能飛燕能舞鳳皇在雲鴻在渚
仙人驂鸞入雲霧寂寂不聞青鳥語
洞天落日晚沈沈漁舟縹緲桃源深
紅玉坐看花著子青雲行見葉成陰
疾雷怒飛風雨急瘦馬不行歸旆濕
投閒一日須一來歲時變化猶呼吸

栽竹

一生正能著幾履曠達人稱阮遙集
何可一日無此君風流我愛王叅軍
夏葛冬裘吾便足由來世間無可欲

但栽翠竹滿東林我日對之歌且吟

送君宜之臨城簿二首

人之與萬物異名而同體貴賤何以殊知與不知爾知

之莫如學

一本云貴賤曷以分知與無知耳謂人或無知亦物而已矣知之莫如學

學莫如

修己汝學自有得願言惟不已不已須

一作終

自到不到

由中止請觀為田者日夜

一作夕

服耒耜久之田自熟其

入須倍蓰至於耕耘廢耒莠敗糜芑常時不用力畬獲

終無幾予與爾知田肆言聊及此

又

事賢如事親敬長如敬兄讀書如喫飯近欲如近兵百
事總欲是一言不可輕汝能慎于初更欲觀厥成仲兮
舍予南汝今復北去南北牽我夢終夕無定處但寄兩
眼淚為君衣上露會知老者心從爾無早暮

送范侍郎帥慶州得以字

池水日夜流日行無停軌人生長道路擾擾還如此莫
辭飲我酒酒盡君且起贈君雙寶劍有言慙近俚聖人

之於物愛視猶赤子

一作視之
猶赤子

顧復愁不至不知分此

爾誰歟較尋尺竟未知所以夷外當反內刮毛須及裏
邊陸今無事自可緩帶理願君宏遠業赫赫光祖禰

送穎叔帥臨洮

風如疾雷電如芋積雪如丘壅道路蔣侯車馳挽不住
見說西人復嘯聚目視陰山欲飛去蔣侯文如江海注
一決萬里無盡處筆落在紙成雲霧氣吞雲夢八九數
力轉丘山縛螭虎終日笑言公不怒三軍號令成樽俎

羌戎膽落汗流跼邊人乃至歌五袴昔誇禁中得頗牧
今見南陽稱召杜前席宣室疑已暮勒功燕然無可慕
歸來遍作人間雨杖杜吾當為君賦

舟中大熱夜半起坐因作是詩寄諸友

星辰與天旋河漢入地流其行雖不同晝夜不自休彼
能致其誠豈不至誠猶如何爾為士乃不彊厥修功不
償其食不如馬與牛金朱豈不寵顧視祇可羞誰謂古
之人乃無一可憂何以圖厥終尚惟友之求

彥衡約飲湖亭行不及赴

主人欲留客其意良已厚行人念行役奔命惟恐後張
帆半夜起撒若驚蓬走盈盈水中蓮鬱鬱堤上柳相別
不相見已行更回首人生如朝露理固無可久可為惟
為德萬一或不朽行也死後已庶猶無大咎君恩不勝
報聊一報我友

宋履中示月桂佳篇并聖俞詩因賦四韻

古人種花昔已老後人種花今更好聽詩令人飢頓飽

嘆息古人不可到庭中花落君勿掃醉飲全勝藉幽草
白髮不嫌花壓帽寄聲我友車先膏

再用前韻書呈諸友學士

凡花朝開幕即老仙桂春花秋更好幽砌終年看不飽
洞門無日春不到玉樽一挹把筆埽跂脚詩成不立草
醉倒淋漓應落帽衣襟沾濕雲如膏

察院學士灸炳連日戲作鄙句

截艾作炷大如椽三日徹夜燒丹田心腹生火口生烟

皮毛潤澤骨骼堅舍杖趨走脚輕儼赫如渥丹顏色鮮
五十六歲如少年願我一生百迭遭病多未老先華顛
欲灸自量無罪愆一切久矣付諸緣三月人家花欲燃
陽春水色碧於天更欲載公青翰船喚取佳人舞繡筵
一飲一斗醉不眠不怕世人笑逃禪火中自會生金蓮
作詩問公奚若旃肌肉忍自投戈鋌亶願厥後勤著鞭
萬事悉置心超然服食不須求永鉛公名已自列諸仙

再用前韻呈察院學士

真人養真如養源道士耕道如耕田吐納日月踏雲烟
牢如金石齒牙堅捷如猿猱身體儼沐浴霧露甚榮鮮
受命一萬有十年既安且樂無迴還後人好惡紛倒顛
涵淫蠱惑作罪愆墮落世網縛塵緣愛河流轉業火燃
猗公淡泊其得天泛泛乘世如虛船精神采色照四筵
老鶴飲露夜不眠戲笑中有第三禪淨不著水花如蓮
酬酢不停奚敏旃賦詩馬上橫及鋌不放祖生先著鞭
北方炎炳自古然其力十百倍凡鉛功成不數飲中仙

是非寄君時

一或以為是一或以為非是非如環中畢竟無窮時汝
唱我其從嗟吾亦何為

自然

皇天典下民寔亦付自然禍福與是非日夜相推遷譬
猶泥在鈞隨分有醜妍醜非其所惡妍非其所憐彼憐
我不知方知樂其天

行西城

我將行西城曲指計日月汝來今幾時已卜錢塘別吾
衰况多病冉冉鬢已雪安能久去汝漫自投羈紲田園
苟可飯聲利非吾屑與汝歸去來相看至耆耄蒼茫尚
無淚空復愁如結

漢上謁劉執中

塵土能汚人有如衣匪澣驅車出閨閣縱目盡江漢漁
舟汎青雲蕭洒雁為伴蘆花如飛雪時逐風散漫可憐
獨清人憔悴行澤畔

答君時用前韻

振衣近滄浪聊以垢膩澣
仰首冥冥雁肅肅在雲漢
吾今寡所合爾獨為吾伴
蕩舟泛江海四顧畏汗漫
君看水中坻不是無邊畔

口占和君時

吾生有窮通吾志不可衰
飄飄如浮雲富貴我何為
我今樂不淺我歌爾其隨
譬猶富者家畜聚不可訾
怡怡任天真何害為
僂僂人惟學不學高下成
雲泥是非惟

所求萬物豈我私君看鑒中明不隱嫫母媼君病本自
無吾藥奚所施惟作日新銘與汝同為規

菊苗

重陽黃菊花零落殆無有微陽動淵泉嫩葉出枯朽青
青好顏色寂寥霜雪後物理如轉環開花豈其久

又

物理如轉環昔亡乃今有眷言離邊菊根葉未終朽盛
衰各一時何足競先後彼花似無情能並天地久

採葵

古人採薇蕨我亦愛斯葵能隨朝陽傾不為秋露萎烹
調戒中厨聊以燕母慈拔根取廉名未愧魯公儀

薺

陰風號暮景零落悲晚秋紛紛彼芳薺鬱鬱此中丘作
甘豈不珍冒寒不為柔薄言擷以歸呼奴具晨羞

途中和君時

相望不相見一步一回頭况汝將有適前路正悠悠土

壤去宛葉星躔近斗牛不知明之日何以解吾憂

又

聞君欲脂車輾轉睡不安憂心頑如石百計不可寬
鴈祇在桑歸雁乃雲端一瞻百歎息強飲終無歡

行役

行行重行行吾役幾時休春風不相饒塵土滿敝裘
人生能幾何乃有十歲憂須知一樽酒可勝萬戶侯

南陽

復爾行南陽興言涉清漢日晴川谷明風靡花竹亂遙
瞻萬山麓近眺樊城岸南北有似離令人感鴻雁

途中

一日復一日悠悠竟何之萬物但此理百年能幾時墨
翟悲已誤賈生哭奚為可憐日月輪日夜爭東西

早起

客心不能休未曉輒欲起耳凍南山風衣冰北溪水捨
我一息勞先行十餘里因知人之學患不勉旃爾

鄱陽集卷一

欽定四庫全書

鄱陽集卷二

宋 彭汝礪 撰

古詩

昨日餞趙教授行會飲秀楚堂晚徙櫻桃花下
夜月上正夫設燭于花下光明焜燿昔所未
見正夫因約賦詩

夜涼月色清如水天靜無風塵不起移酒近花坐明月
畫燭橫斜插花裏月寒燭艷花淡薄意思相疑不相似

一下一高揔能見半白半紅渾可喜時有幽香闇着人
更分疎影低臨水密如雲霧即成陰團作珠璣看結子
異時尚擬與君醉景物更作今日比富貴功名是底物
人生百年行樂耳

再用前韻

朝日薰酣晨露洗中林入夜幽香起燭與花明月影中
月和燭照花陰裏光華混雜不可認刻畫雖工難比似
燭偏月下花亦別疎影橫從俱可喜使君白頭衰久矣

空惜流年去如水作詩與花雪羞恥多材自屬佳公子
青春九十今能幾不當祇作常時比莫令俗事一關心
可厭浩歌頻到耳

又

夜色清如水新洗月上燭明栖鳥起灼灼其華散成綺
仙翁岼幘光明裏公明如月非如燭文華亦非花得似
安危自以天下任故與衆人同笑喜手折芳枝嚼紅蕊
臨池想濯滄浪水芳菲肯付游人醉知公愛民一如子

月盈易虧花落易直須催促公排比公看光陰去無止
歎如白駒過隙耳

次正夫登沛中歌風臺

屹屹泗上城隆隆沛中臺登臺不見人祇見山崔嵬高
祖湯武資神明天所開潛龍已飛躍乘馬寧遄迴倒戈
與天旋萬國俱子來西楚殪封兕東齊蕩纖埃任使雖
故人蕭曹亦賢哉功成思猛士樂極自成哀如何古之
人懿德乃所懷

次正夫相寄佳句

朱橘大可圍白魚濶盈尺掀林擷甘芳艤岸披的皪我
酒清且旨于焉餞佳客鴻飛不知遠日暮寒雲碧回瀾
祇如昨不見舟行跡寄詩何適麗若見好顏色遙想翰
墨揮波濤瀉胸臆維纚遠林外坐看晨風翼萬物歸一
致知公無不適人之與天地同是為形役

次正夫宿留侯廟韻

龍飛景雲從林茂衆鳥息真人翔灞上多士生王國留

侯豪傑士乃獨為所得韓亡竟不去漢興愈厲策不見
馬上功奚多幕中畫眇焉視嬰布若數百與億鴻鵠已
高飛翩然歛歸翼翼堂堂高皇業屹立如磐石始卒如公
者是不慙廟食載瞻水邊祠老檜寒更碧

次正夫途中懷親韻

動靜非兩途久勞逸更好開門看白雲婉婉出山嶠身
間亦已樂言念親及耄豈無青精飯每食終不飽鏡中
髮如漆一夜成素葆言歸采其蘭堂北種萱草日以五

鼎食不如綵衣老我今無此樂感泣形已槁日夜思故鄉
敲眠夢郊堡

次正夫途中蔬食韻

昔未與公游同志不同居我寵居鳳掖公名專石渠醪
醴賜上尊膏羶給天廚彭城作逐客事事秦越殊尚慙
素餐詩苦畏城旦書豈能萬錢食謬駕雙輪車時時置
盃盤登眺隨所如公行適在野乃至歌無魚人生一世
間百年實斯須無所不可安何獨貴紆朱飲河惟滿腹

奚欠亦奚餘作詩促公歸去直承明廬

正夫卧疾予往訪之正夫置酒因作是詩

來問清漳病煩置東武酒敬窺石竅君愛始士衡母大
論窺道與禪關恣深叩是非棄糠粃直與造化友人游
于一世萬事俱非偶養疾先息念息念他何有此言乃
良藥不在砭石後長日從公游徑醉須五斗

再用前韻

從公飲輒醉醉德非醉酒噬肯易子教義應容拜母歌

聲清以長發若金石叩予非多聞者或似直諒友身世
飄流並神形條達偶萬事實一夢奚忘亦奚有是非可
姑置試俟千載後但願酒不空何庸印如斗

和君時十章章四句

猗彼君子篤志乎道道之云遠於焉慥慥猗彼君子克
誠其身匪祿是榮日以養親孰違孰從曰吾從義孰去
孰與曰吾由禮溫清匪偕云如之何得彼失茲得失孰
多吾斯未信吾顏之厚重輕惟法于爾何有爾旋爾車

不知其期我陟其岡祇益我思凡人逐物其力則倍苟
知其養是用無悔無悔無尤是則養親爾慎旃哉以慰
母心為山一簣懼乎或止道之云遠曷云其已我田我
田以遲爾歸何速于行姑樂我私

寄君時四章章四句

我脂我車陟彼高岡母也吾懷匪居或忘我帆我舟汎
彼大江母也吾憂匪食或皇我池有魚亦可以羹何必
鮪及魴叔兮其歸哉我田有菽苟可以食何必稻與梁

叔兮其歸哉

寄君時六章章四句

我思古人克誠其心如陟于高如臨于深我處于中而
舍其偏我棄其零而取其全勿謂道遠我至之難我勇
以前人孰我先勿謂過小我姑為之千里之差始于毫
釐勇兮勇兮子我所器子誠不已我今所畏子能吾取
吾誰之匿子銘于盤以視朝夕

寄君時四章章四句

春之日予侍親游采菊苗以歸念吾弟之未見也因寄是詩焉

我灌我園有采之心于以擷之既有且多我遊我庭有菊之苗于以采之既旨且時我思昔人亦采其微我樂所安奚愠其微仲兮仲兮曷日汝偕以事以游以慰予懷

元祐元年十二月庚子雪夏首萼湖結冰鵲鵲羣集於上者至不可數感而作是詩也

宛彼鵲鵲其樂孔羣彼類維何而有若于仁兮宛彼鵲鵲
鵲爰集于冰彼至維何而有冽其清兮宛彼鵲鵲既飛
且鳴彼行維何而有篤其誠兮

一云底
于誠兮

寄甯和仲二章章四句

鳳山之泉孔潔且長止而不流是不如汙潢鳳山之木
可棟大厦舍而殘之是將與荆棘而並化

送張子固詩并序

大理寺丞致仕德與張公偕先考執友予十

六七時從其子正父季友學明叔禮遇予厚
明叔子子固娶予作賀客畢席復入宴予時
善飲寺丞公取大白觴余厥容幾一升戲曰
能復飲子魁天下曰能連三引皆空予後忝
竊公笑曰長者言果信後子固有子根予見
其為童兒巍巍然有立又見其為太學諸生
遂中第元豐甲子備使京西與子固遇襄道
及故舊連日不能去曲指當時或化為鬼或

老為叟或窮且病饑餓不能出門戶蓋無有
赫然顯榮者而予更罹憂患鬢髮斑白相與
飲酒飲絕少亦醉醉亦不樂無復少年時氣
味因嗟歎久之予曰凡人少老死猶之寒暑
晝夜自無足怪惟君子卓然自立不係得喪
不懸貴賤雖老而聰明識慮如少壯人雖死
而聲聞不亡如予之昏溺不肖乃休于所養
竊食苟祿終恐不能免與草木並腐朽雖然

敢不勉子固少予五歲嘗薦開封根仕即不復
言進取其志落落然自奮立者是不難亦勉
之而已子固曰予敢不承又曰吾邑公所游
吾父後徙居吳園稍有臺榭池沼之好欲乞
公詩予曰德興山水之勝予游最舊今十餘
年矣其登臨之樂往往時見于夢寐其發於
篇章多矣今所賦何辭正父諱汲終大名府
判官季友名須終殿中丞淮南西路提舉常

平廣惠農田水利等事明叔諱潛子固名
磐根今為臨江軍司理參軍

吾少飲酒不知數有如長虹吞百川老來畏酒飲輒醉
百事一無如少年瘦脚跟蹌走病鶴吟腸悲壯啼寒蟬
夫君尚勇不宜怯急上青雲須著鞭

吳園雜詠十九首

布衣韓彭誅國奪名亦隕芮王獨以正百世榮如近至
今園中草欲踐猶不忍

右吳園

高閣高入雲
俛焉視岡阜
老來更無事
賓至但飲酒
陰功在其鄉
更足燕爾後

右燕閣

藐視一簞贏
金獨藏五車
書高堂見古
今其樂亦只
且以此燕子
孫吾誰數陶
朱

右書堂

室虛即生白
惟道在集虛
詩書埽塵跡
仁義外遽廬
形

忘心亦忘萬物同一如

右集虛堂

本覺不見覺大夢非是夢覺夢夢非覺其歸理則共兔

魚亦既得筌蹄自無用

見一作為

右覺軒

飛簷截山出碧瓦貼雲齊水靜見魚樂竹深聞鳥啼春
風花落處誤認武陵溪

右山亭

男兒厥生時弧矢射四方茲禮古所重嘆嗟今已亡典
章可披尋君試行一鄉

右觀德亭

大風無邪聲積雪不改色根方為龍去實擬待鳳食一
日有不見恍如歲三易

右思賢亭

青竹老出藍紫竹嫩施粉樂彼奇節並歲寒不彫隕言
如拾芥者設意毋乃近

右紫筠亭

塵土能汙人譬如衣匪澣窺臨得清曠其去已大半不
必濯滄浪神明自還觀

右澡雪亭

時將景共好物與心相投曠覽盡萬物分明一浮漚此
臺無不并樂只臺上游

右四并臺

大池方如矩小池曲如鉤方奚避汙辱曲不趨公侯時

傍白蓮葉獨行青翰舟

右四曲池

枝幹上參天長松不枯槁朱頂雪衣裳仙鶴顏色好主

人一千歲似此

一本作還似

松鶴老

右眉壽堂

徙竹種前林栽松滿幽島主人無所憂不用植萱草吐

納奚所事忘憂自難老

右忘憂亭

秋月如秋水瑩澈萬里流我欲挹其清登彼百尺樓
隨時有佳趣不但是中秋

右秋月樓

多稼為豐年觀言亦云樂秋雲滿原隰漫不知厚薄
帝力彼焉知陶然飽耕穫

右觀稼亭

衆人貪徇財種利不種德誰如之人心白首能戒得
以此風里問貪競當自息

右戒得菴

豈不有春華不如秋後香
紅紫不禁風黃花耐雪霜
幾時登其亭采采泛彼觴

右秋香亭

衆山走蜿蜒高閣立崔嵬
流水橫其前時有薰風來
聊可解吾愠敢言阜民財

右薰風閣

晨起祠先農道中

更闌燭花低呼童起視夜問夜如何其露落月未謝皇
帝共神明朝燕或為罷多儀禮有敬少怠刑無赦今茲
先農饗上意在耕稼駕言投明起不敢私安暇馬蹄踏
冰雪霧露濕鞍馬寒林月中影十里開圖畫燈火望壇
場冠裳出次舍銑洋響金石馨香紛彛箏百年禮樂中
萬事無雜霸昏冥久塵土今日聞韶夏心知至誠通自
可膏澤下清風吹菽麥綠陰密桑柘人家實倉廩得以
時婚嫁四夷共安富兵偃祭類禡山川百神寧天子樂

無假敢後秋冬報還見擊鼓御願予真缺然何以補漏
罅尚堪逐農樵擊壤歌聖化

自吉泛舟入贛

我行欲從車好風苦相招謂言困行役厭此道路遙駸
駸四駱馬終日在茗堯簿書更追隨精耗髮欲焦乃復
汎栢舟錦慢蘭為橈是時春始和暖風秀蘭茗彼柳已
青青彼桃已天天王事敢不修我行歌且謠彼不知之
者謂我士也驕不知非所知我茲以逍遙

奚奴

禿髮奚奴色如玉，頰拳突起深其目。
鼻頭穹隆脚心曲，被裘騎馬追鴻鵠。
出入林莽乘山谷，凌空絕險如平陸。
臂鷹縹犬紛馳逐，雕弓羽箭黃金鏃。
爭血雉兔羞麋鹿，詭遇得禽非我欲。
莫怪小兒敏捷強，老宿塞外以此為風俗。

六月自西城歸

駕言將西征，呼僕問行李。
吾行無所苟，雖遠親則喜。
癡

兒不知事飲血淚如水憶昨唐許邊逋逃聚蜂蟻巔崖
寄巢穴絕險不可逼撲滅無先幾捕督誤詔旨是時寡
妻病吾計或可止君曰無妄私促裝勉行矣妾病雖云
危姑慈有足恃是身如浮雲永訣或此始一馬纔登途
渠魁頭掛市猶虞未寧歸走計忽在耳羈栖二十年梁
肉飽有幾單車行四方歲月幾萬里私居乃如寄方此
還之彼愛君能知分嗜苦同甘旨誓欲相厥成完百無
一毀中流卽我棄我恨無涯涘家貧未能去顧惜尚壯

齒含愁復于行嗜祿祇自鄙悠悠步清漢欲往轅更柅
滄浪照顏面不與舊相似蓬髮生雪霜龜胸點泥滓驕
陽恰中伏旱魃方哆侈山川惜陰雨我稼病未起高堂
蔽重簾捉扇衣屢褫乃茲趨長途登降遍剝施簡書况
有限暮晚未擔弛山名初外朝爰業超衆歸自均州入
金州山名
自外朝始其略可記曰外朝大姨干平大小鷄鳴馬息
八疊土門悔來方城羅巔長遙端起霍山蚌岑龍泉燕
子勾平磊石女媧狗脊馬鞍留停越巔鳳晴天出萬象
皇而女媧最為高且遠其他不可勝數
擾擾誰經記濫觴一拳多結構五丸累蛟龍跨鴻濛殿

閣聳礧礧或植如劍戟或覆如釜錡或視而錯愕或行而迤邐或大而無當或立而不倚干平七峰老秀拔匪衆比者舊今所貴瞻言但擎蹠馬息睽八疊培塿看岡岷藍輦勞攀牽卒餓弗克仔肺聲幾成雷背汗欲濡軌吾疲尚能徒走驟托杖履豈不有林木日晝方如燬曉行怯霧露夜涉愁地虺屋頽菱窮閭魚餒飯乾米田功微梁稻圃學蕃麻泉截筒戶割漆剥楮人抄紙千楓立青冥萬竹秀披靡時時得流泉灌溉移日晷清音有可

樂往往中宮徵孰謂彼房陵千家住清泚神仙隱九室
綽約如處子安眠費春秋官爵棄敝屣寶公浮杯來宴
坐有舊址甘雨隨衆緣凶年作蕃社欲游嗟不遑悵望
祇懸企東西更多山小大或億秭未經夏禹鑿想待愚
公徙橫梯險相聯曲棧危半陴避就為俛眉循緣或顛
趾女媧高第一僅去天尺咫黎明登其顛星宿可俯視
扶桑出曉日洞徹及表裏丘陵雜繭栗草木浮糠粃補
天聞故老豈或有此理天之于空虛一大器而已物或

有不完補之非天恥酒觴薦明誠感嘆至橫涕留停仰
媯墟欲至更遠迤烟嵐相薰蒸闇暗常及已雜民久薰
陶頑吏傲鞭箠令人愧滿面虞舜昔居此商洛不十舍
怒焉想黃綺奔馳浪南北僂俛慚祿仕紛紛昨夜夢慈
母倚門俟願騎雙鴻鵠更挾四騄駘言乘溪上舟出宿
城邊址峯巒欲飛去峭拔陵天委神奇雜鬼怪巧絕非
剗剖龍盟秦世松玉滴堯時髓波瀾雜雲霧莽蒼在隱
几平生貪幽勝短槩行復艤一灘復一磧却望無首尾

自漢陰至襄難名可
記者凡百九十五
嶄嶄邊傍石出沒競譎詭細垂一

絲縷大作十虎兕衝撞非雷霆震蕩岼欲圮龜鼉不能
游蛟蜃得所慘懸流落千仞急疾過發矢浮生真如葉
轉足見生死篙工相號呼熟視但如砥謂予且從陸厥
計亦非是吾生自有分纖悉不在已緬思濠上魚載顧
山梁雉未能脫韁鎖可恨譏鑪錘孔卧弗煖席禹行尚
乘櫓所慚一無補虛冒恩私被夜凉泛明月不寐對瀟
灑鳳林莽何處草木秀嶷嶷槎頭縮項鱖不減河魴美

習池今可游尊酒慰勞只鴻雁香未來將詩寄雙鯉

寄君時

豈不有性靈稍可學操縵公私足憂責耗蠹幾大半馳
驅寢食廢真自殘軀榦叔兮識至理真偽不可亂讀書
老不輟夜坐頻達旦特立無倚著剛嚴寔予憚歲時有
多少每復愁分散顧瞻鵲鷦飛俛仰發浩歎安得桑麻
田穀粟粗可飯晨昏侍萱堂綵服何粲粲歲切庶寡尤
詩書恣娛玩相從不相離如彼鴻與鴈

觀畫

少時馳驅走四方馬足遍踏無邊疆北踰崦嵫薄扶桑
遠涉羊腸上太行歷參步昴捫亢房蕩舟溟渤浮河潢
五湖彭蠡窺沅湘蛟龍出沒鱗鬣蒼大浪震疊鍾鼓撞
怒蜃結構珠瑤光游魚鰈鰨鮠魴鰻鰪沉浮旅駕鴈
大鵬一飛凌鷦鷯中林荃蕙雜蘭茝妖紅曼綠艷靚妝
回溪曲覆秀篔簹老松怪柏號風霜桂丹楓赤橘柚黃
閨風仙人醉瓊漿前旆虹蜺騎鳳皇雲臺曲壁絡奇璜

縹緲天樂非宮商我欲從之匪暇遑昨朝圖畫紛開張
睥睨舊游心惚恍南嶺赤日西玄霜愁雲不開雨雪雱
變化倏忽無經常陰樓傑閣鬱相望遠峯截嶂插雕梁
商人騎馬兒牧羊牛車魚艇浮纖芒蒼鷺無聲浴滄浪
熟視却顧疑騰驤驂騑奚為棄路傍骨骼雖老終軒昂
重陽籬菊開煌煌怪見桃杏爭芬芳梅花一枝忽自折
半籬髮鬢聞幽香文陞網戶綠綺窓中有美人豈娛煌
流珠蛺蝶金鴛鴦一盼少年猶斷腸蓬萊宮中日月長

世界凡閱幾炎涼悠悠彼樂未遽央
碁局未知誰子強
龐眉老僧坐道場
手捉拂子據繩牀
似達至理言慮亡
惟我知彼真荒唐
乃知畫工匪其良
倒置高下翫陰陽
鬼神醜怪不能藏
咫尺千里無準量
屈折海岱留縑緗
物象涕泣愁斧戕
貴家欲得心奔忙
背錦軸玉紅綈囊
君亦愛之未能忘
苟不溺心奚所妨
我今與公陟高岡
坐視四海超八荒
圖史羅列耀文章
前有唐虞上義皇
左右孔孟從莊揚
朝莫見之心肅
莊議論興廢評
否臧

卑陋不肯數漢唐廣莫之野無何鄉我與子樂奚其將
荅蜀公謝寄酒

彼酒孰為之湛然若天成為之非草草纖悉中度程其
香匹幽蘭色不減瓊英采采白菊花亦酌潭水清潭水
取之源擇菊廢枝莖我將饗明神乃獨以其精千里馳
寄公非將解公醒祝公百年壽多益不為盈想公初飲
時瑩徹顏微赧幽吟倚崑石緩步睨層城爰聞在陰鶴
載嘆出谷鶯我聞至人心萬物莫足櫻存亡漫憂喜泛

然若無情此理公得之奚藉醪醴并

方城與君時相別遇雨寄是詩

五更赤晴平旦雨愁雲不開風勁怒霰電夜落大如芋
日月不出愁烏兔兄曰嗟予季行役道阻且修日云暮
泥深一尺水交注僕肩不任馬蹄駐一車十牛不能御
晨征忽忽立乘遽恐汝悲啼不還顧昔知為快今知誤
恨不赭陽一月住人生百年唯所遇曲折萬變皆歸數
乾坤與人同寄寓擾擾眼前皆細故慎勿動心悲景露

九阪王陽猶叱馭平明天晴卷雲霧驂驪安穩行道路
一日千里如跬步

我行

我行日不休行亦讀吾書朝為忘機鷗夜作不瞑魚日
月雙跳九乾坤一蘧廬而吾于其間擾擾亦自如

離家

離家一千里十日不得書不怨天上鴻祇恨水中魚我
行穀伯國明日武侯廬慈親髮雪白安否比何如

游峴首

去年冬少雪二月春始晴南游峴首山東下石頭城揉
藍染江水爛錦貼園英幽亭一杯酒不用千載名

叔子祠堂

不折亭下柏不採山頭石羊公昔茲遊千載人愛惜焚
香薦卮酒一拜三嘆息却汎峴水波汪洋感餘澤

恒河

恒河世界浮漚上潏潏衆生久流浪老蠶作繭自糾纏

枯木生蟲不相放止止靈泉風震蕩昭昭惠日雲遮障
却語諸人莫惆悵煩惱菩提同一相

舟行

莫打槳打槳驚鴻雁鴻雁不慕魚蝦賤暮宿江湖畫雲
漢我不見之其心亂莫鳴榔鳴榔鴻雁飛鴻雁不是雞
驚兒我不見之心孔悲

送君時

思親一日如三歲去家十舍如萬里投明叔也欲別我

枕上聞雞淚如洗丈夫蓋棺事則已君雖白髮猶壯齒
奚慚折腰五斗米三釜及親胡不喜弧桑蓬矢射四方
男子生來志如此

高陽池

駕言之石城爰至高陽池是時春始和池水生渺瀰徒
能躊躇顧不及酩酊歸令人憶山翁倒著白接羅

谷隱寺

樓臺寄山巔屹屹與雲齊登臨覽昭曠感慨發悲悽西

顧隆中廬北睨漢陰畦
願言脫樊籠超然此幽棲

白馬寺

寺有龍池

老龍挾神機變化無拘攣
大作四海水斂為一泓泉
白露泛素液黃金折嘉蓮
樂哉襄陽人歲歲無凶年

春風破窮陰

春風破窮陰草木爭秀發
紛敷作錦繡晃耀映霜雪
我行縱披賞欲戴羞白髮
相看一杯酒聊以酬佳節

寄十二十四弟


有弟有弟各一隅
萬里不見徒嗟吁
江湖春色又歸矣
庭檻花枝還有無
欲寄我聲無鯉魚
欲寫我恨無酒壺
開編一見鵲鴝詩
潸然淚落如真珠

秋風

晚來雨霽秋風顛
驚我枕上清晝眠
四林荒涼好景氣
萬里晻靄皆雲烟
乳鳩深藏叫苦竹
蒼鶻歛起摩青天
花枝柳葉便凋隕
山上松筠徑儼然

武岡路中

朝行黃茅岡暮宿黃茅驛一岡復一岡岡岡如絡繹一驛復一驛思親頭易白何時自此還行李歎晨夕



鄱陽集卷二

欽定四庫全書

集部

鄱陽集卷三

四

詳校官庶吉士_臣范逢恩

檢討_臣何思鈞覆勘

總校官編修_臣王煦緒

校對官助教_臣下維吉

謄錄監生_臣沈瑞錦

欽定四庫全書

鄱陽集卷三

宋

彭汝礪 撰

古詩

城東行去李簡夫甚適可以卜見而俱有往

返之禁因戲為歌馳寄

簡夫名佖時
監東水門

故人咫尺水東頭我欲見之心悠悠有足欲往不自由
形骸靜對鶯花留我思肥陵昔之游雲霧密鎖城上樓
把酒待月生海陬月到行午醉未休濡須南池水中洲

脫帽散髮尋漁舟夕陽扶欄持釣鉤
白蘋風起寒颼颼別來紛紛幾春秋
彼此待盡棲林丘滴泪落水東爭流
肺肝雖大不容憂殘息乃復如懸疣
得官相望真如囚李夫子借使復得把
酒與子飲其樂還如昔時不我今
鬢髮已絲志已偷力不能前鈍如牛
泡浪亦悟吾生浮尚壯欲以華簪投
日月逐逐同傳郵何用自與身為矛
我歌草草子須酬欲讀子歌銷我愁

舟過當塗

悠悠章江杞復自姑孰北此身與此水日夜俱無息關
關林中鳥軟語如相識楊柳枝葉長青青祇如昔唯予
鬢間髮種種添新白開尊泛溪水宛轉隨山色四方本
予志夷險非我側掛帆出長江萬里追鵬翼

阻風飲酒

繫舟不能前酌酒聊自慰異鄉少親友市遠無蕪味惟
茲佳山水渾渾含正氣旁皇無賓主恣取不為費王事
不為緩簡書實吾畏夜晴如何其呼吏看星緯

癸未季秋偕子仲都官文淵節推子堅先輩同
遊東湖分題得東字

高山據西南湖水自南東中有避漢人如彼雲中鴻一
日克諸已百世聞其風樂哉今日游況有賢者同

和廣漢見和東字

駕言欲何之于彼湖水東茫洋衆游魚凌厲一歸鴻爵
慈挹飛泉解帶臨清風寄聲詩中伯暇日倘來同

又

出處勢不齊譬若西與東在陰有鳴鶴漸陸見飛鴻禹
稷顏回道下惠伯夷風故彼孺子者亦庶與古同

與寧節推游聘君亭邂逅廣漢同遊分題得聘

字

漢衰至桓靈王室既不競豪杰死黨錮奸嬖偷權柄娟
娟彼孺子德譽南州盛耕稼以自食羞詣安車聘彼非
硜硜者而欲為奇行未能比禹稷夫豈慙遽寧我登斯
亭上悠悠發幽興高山知仰止池水不可泳魚戲芙蓉

花鳥雜參差荇嗟嘆之不足俛仰成諷詠

送甯秀才過溪口占

邂逅吾所樂爰復惜分攜繫帆且少留聊慰吾所思嗟
我行老矣志意非昔時鬢毛黑如漆種種今如絲譬如
七年牛力乏氣亦衰嘯嚕食青芻欲往脚自遲愛子齒
未壯骨骼超等夷軒昂宇宙間萬里惟所之舉足我即
到寧復論華夷行矣尚勉旃卒慰吾所期

沐浴有感

去后如去邪不欲留毫分髮不止一沐身不止三薰如
何迷本原浴德不自勤區區養楓棘俯仰愧前聞

答張天覺學士

龐蘊襄陽老精怪辛勤欲挾山超海破除枉被馬師瞞
扶起賴存靈照在最上一機終不傳喃喃謾自費羅千
晚年遭值張居士冷火寒灰更熾然

內鄉先春

古寺前無廊空林中有亭浙水為襟帶蕭山作畫屏仰

高聽流水志體得所寧不能念羈旅天地俱浮萍舉首

望飛泉

一云仰高看流水

日暮未肯歸夜涼多好風明月有清

輝一舉隨所之不如鴻鵠飛思親淚如雨有露亦在衣

未肯一作未忍

久雨

十日七日雨十步九步水師徒宿蓐莽宴坐吾亦恥其
誰護封穴未忍鳥鼠死天意若有謂無人可言此

寄定州許資政

中行耀師寵北顧寬上憂惠澤蘇民瘼威名聞鬼陬鹽
梅合調羹帷幄聊運籌中山想可見更登城上樓清患
在未形患形其計難父老不言兵朝廷今久安貴侯弄
絲竹騎士矜綺紈念念須預防壯士心為寒非公能知
微何敢矢此言

月夜示子文

喜見明月到池東我時獨與孤轉同山光水色飲不盡
更煩佳木來清風浩歌一聲志萬里飛飛欲到蟾蜍宮

君家玉琴試借我為君寫盡絲絃中

招趙溫甫飲

典衫買酒送春歸與春惜別無歡怡窮邨荒涼物色薄
肥雞綠笋皆出雌却思清談醉我腹願君促駕無遲遲

和蔣深甫雪亭韻

巉巖巨石藏蛟龍石破龍歸舊跡空風生江面激驚浪
雨歇天涯橫斷虹高吟獨據一老木遠望喜見雙飛鴻
縱步忽逢溪上叟忘言疑是渭濱翁

賦朱令水渠

宣城貌古心亦老自誇渠成非草草始挈孤忠犯衆仇
此身棄絕甘夷島異言塞盡流始通大功成就民斯保
天子虛心問民利利如此渠亦須寶

諒闇聞笛

夜聞孤笛城頭上少年側聽成惆悵明月紛紛送憂咽
清風點點來悽愴鼎湖夢短飛不到蒼梧望斷目幾耗
此身犬馬賤徒勞君德岳山崇未報

積德

積德由絲毫揚名滿天地古人成之難今人敗之易不知責已重而獨于人備天下此說用無亦殘風誼觀物竊有得作詩聊自誌

有感

吾身本山林艱難知備嘗天寒負書橐萬里冒雪霜山川風借力道路泥為漿瘦馬鞭不前悲歌自慨慷今也偶得祿雖勞庸何傷念爾草野夫百輩勤送將不惟風

雪勤無乃田疇妨素餐煩爾徒心顏兩愧惶作詩書諸
紳庶幾久無忘

夜登竹亭

碧玉

亭名

多朝風蕭洒不及夜滄溟月飛出碎影如刻畫

愛君有素節霜雪不凋謝無言靜相對似欲聞情話城
上已三更欲歸猶未罷

輕舟

輕舟入深川鈍駒陟高山胡為棄安樂輕去趨險艱一

身事業荒雙親鬢髮班思之不遠慮覽照胡為顏

隣雞

鄰雞號清晨客子起長道二儀久風雨百里生泥潦高
山險難登鈍馬行欲倒僕勞請休息西北日尚杲

寒食

山川路崎嶇于此遇寒食冒雨雖甚苦驅車不遑息敵
愁酒無功悅目花少色誰當逆旅思獨任清吟力

游子

游子何所之上下山水中泛濫不繫舟飄飄孤飛鴻楊
朱泣路歧阮籍悲途窮我志非此流高吟屬春風

陟山登澗

此身何時休終日鎮衮衮纔登澗之濱又陟山之阪僕
驚怯負重馬困憂途遠道路亦常態勉旃強餐飯

偶題

雖然鳳之雛傑然龍之駒九天無亂雲萬里多坦途霜
蹄風翻一朝舉疲驚燕雀安能俱

贈君俞茶孟

人心一何巧得泥自山隅運泥置盤中百轉成雙孟粹
質淹雪霜清輝奪璫璵精明絕隱匿潔白無瑕汚殷勤
持贈君意似生束芻

賦劉令公署雙頭芍藥

花容人所憐花意我獨知雨露三月春齊榮一纖枝並
立無妬心相逢况芳時長同白日照不為顛風離世情
正睽乖因賦芍藥詩

自誠

居方貴由禮待物當竭誠誠亡鄙慮見禮去驕心萌曾
參日三省楊子嗟四輕勉旃踐此誠蠻貊猶可行

寄春卿

相約童稚間遂成歲寒圖奈何離別多各自東西隅我
心明月輪子志青松株明月千里光豈為吳越殊青松
四時心豈為風霜枯相思不相見作詩報區區

自謝

瘠田歷水旱畎畝多荒蕪良農為耨耰不歲成膏腴瘦
木僵風雪枝幹皆蟠迂良工試刻斲不日成盤盂在人
雖不肖蒙教當自殊重念賤子庸僅同流俗愚學不達
本原行行無廉隅九思失孔戒三省忘曾模背道而妄
行輕言以招辜一身旅焚巢衆目睽張弧奔馳今逝矣
玷圭可磨乎晝寢過甚微聖門斥弗誅于今底荒唐較
彼尤昏逾尚賴君子仁為包小人蒙未即遠方屏止于
鳴鼓攻過愆苟不滌憂慮環無窮歸來訟醜跡欲自鞭

微躬父母遣汝來期爾才德豐親友壯爾行思爾事業
充不沿仁義流反扇偷情風固宜衆人歸詎可多雷同
猶願追已往從此圖令終庶幾謝顏子自誓規繆公敢
期白日光重照幽谷中驅除困蒙吝震蕩迷復凶作詩
代負荆鄙誠實慙慙

衢州道中

登山復降山僕膝良已酸出溪復入溪僕衣未嘗乾嗟
余久羈旅囊橐亦已殫無食充爾饑無衣覆爾寒買酒

聊一醉行行莫長歎

冬日道中

夜卧衾裯單不敢嗟體寒晨餐蔬食微不敢歎腹饑重
念饑寒民亦有甚我身我心若嗟吁彼俗當何如

寄甯子文

相逢一笑東風前相別一醉昌江邊我來西山春正妍
未見君子心欲燃紫泥詔命鼎來矣黃卷文章宜勉旃
題柱相如知有志著鞭無使祖生先

送蔣司勲赴河北漕使之奇

於皇時宋治定百年朝廷肅雍以有多賢蔣侯孔碩克
明其德其立嶷嶷其嚴翼翼英考是擢以司邦直彼富
貴不仁人則憚之侯曰吾治之彼孤有幼人則侮之侯
曰吾綏之竄逐流落江湖東南侯曰行哉義豈吾慚皇
帝思之擢使于閩于淮于江治績升聞皇帝曰咨朕寵
爾勤俾相爾攸宜莫如河朔往都漕事以謀以度侯拜
稽首受命不敢居言秣其馬言脂其車其馬駢駢雖疾

而儀其車軒軒既博且閑蔣侯歸止覲于天子天子是
喜曰朕有賢卿士明明蔣侯政事文章以明以將當至
廟堂矣止河一方汝礪作詩式贈其行俾人詠歌以永
厥聲

送上官察院歸閩中

均

南山幽幽非可陵之立淵淵其淵非潢汙之泉我徒以
趨君假我以車我泳而游君載我以舟君行未至我心
非樂君去不遲如之何勿思是用作歌以告吾懷

某偷情不强日陷罪惡元忠哀憐蠢愚未忍誅
絕賜詩為戒佩服弗忘韻險且長賡和未逮

聊作短句以代負荊

小人無遠慮苟志懷與安富貴本浮雲百計圖一完辰
乎來之遲玩弄如等閒其不為禽狄不能分寸間故人
哀憐之投以藥石言伏讀夜達旦顏汗肌骨寒願惟壯
盛時氣大力亦敦泰山陟其巔不見宇宙寬蕩舟絕溟
渤獨自觀其瀾老大不自強喑嘿甘素餐更欲盜恩榮

歸取妻子歡自非仁人心孰肯救此患過惡苟容改勿
憚提耳煩將大書諸紳佩服永弗諉

蔣穎叔以廣陵詩見贈次其韻

久病乘秋足寒熱欲巢高木藏營窟衰遲不是富貴人
便合買田投印紱荆溪大士簡我詩坐覺閭室陰雲披
垢盡清明入兩目憂忘喜樂生中脾絨膝局鐫欲自私
不知半夜揚清輝兒童怪駭私問我謂予蘊玉藏珠穎
輜車近說足遐觀烟霞日夜生毫端樓臺縹緲雲中寺

衆馬不前君獨至却躋雙林跋提水更登百丈大雄山
游淮已擅中秋夜落帽須分九日天茱萸准擬樓頭會
終朝把酒十峰對杖藜徙倚望八荒孤鴻飛出青雲外

擬田園樂

六言

買田何須近郭作屋却要依山青松共我終始白鳥隨
人往還

二

春酒家家初熟春花處處光輝看花更攜酒去酒醉却

插花歸

三

步月溪頭置酒野草不妨醉眠百歲獨多暇日萬家共
樂豐年

四

山色依雲閣淡溪聲漱玉玲瓏孤笛醉吹明月扁舟卧
釣秋風

五

霜寒木黍初熟日落牛羊自歸樂事須還田舍浮名不
入柴扉

六

稚子騎牛橫笛老翁置酒高歌算來人生有幾莫問世
事如何

送許屯田

君嘗治浮梁德愛均父母黎明令一出百里無敢侮黠
吏竄狐鼠惠愛沾農畝浮梁巧燒瓷顏色比瓊玖因官

射利疾衆喜君獨不父老爭歎息此事古未有

浮梁父老言自

來作知縣不買瓷甌者一人君是也作饒州不買者一人今程少卿嗣宗是也

君嘗速我飲漓

薄祇村酒君舉長滿觴我畏不濡口京師晚相值相笑

俱老醜我欲提君名四方為奔走君立掉頭去自謝吾

無取移舟去都門待水三月久不一詣權貴掛席隨南

斗廬陵據艱險獄訟成淵藪君以一目視無惡亦無苟

三年最課上坐冠江西部我來君及瓜欲薦嗟掣肘有

才使如君未見終不售即聽宣室詔莫愛潮陽守

廣東薦君

陽潮

馬粹老謁黃龍祖心云得趣向處除煩惱矣因
以偈謁之

門門趙州門路路曹溪路此間無向背云何說向趣佛
遊五濁世不說無煩惱此心即是佛云何說除埽

大暑道中

高堂卧清風願我豈不欲王事不可緩驅車冒炎酷赤
日暴形骸毛髮幾焦禿義命有固然勤勞不為辱

小舟過陂口

輕舟落陂滑脫去如一葉篙工習歌險振呼矜巧捷急
水生涼風盛暑熨汗決涉遠雖力壯臨危固心怯不如
山居安寃夢亦安帖

大暑息林下

溪流轉東西日色不可障水風鼓炎熱如坐蒸炊上幽
林隕山谷弛楫沒清曠行矣難少留白雲在吾望

老母德安縣君生辰頌時湖南奉使途中作

有節維冬有載維春維時斯成維誕斯辰婦妾祇祇兒
女詵詵是笑是言是祝是虔其德維何維厚之坤其福
維何維北之山嗟爾小子不克駿奔靡不肅雍維我母
賢無有申之有永其年

自勉呈尊叔

欲成九層臺不敢寧厥居昨朝雨暴至圯敗祇須臾百
年養不足一日毀有餘非叔有至言吾終小人徒

和君時城上樂字韻

吾衰寡所欣惟子足與樂愛君凌雲氣更老更充擴危
城縱登眺萬里見澄廓中林韻秋風往往中宮角瓊液
白玉漿十分許君酌是非等毫髮未足煩商榷貪狗終
不還彼哉世人錯

長蘆阻風

縱目江南路繫船淮上村長蘆雲作陣高柳石為根浪
逐江風急潮連海水渾雪霜千騎散鉦鼓萬兵屯蒲蓼
魚游處泥沙鳥篆痕參差隣畫舫咫尺想空門

泊舟處
與諸君

相隣不相見數日矣長蘆寺咫尺以水療不克往

貝葉有秘語韋編無近言漫

瞻雙去翼空飾兩朱轡好在彌天釋何如炙髹髡濁清羅酒竿南北看風幡敬信無非事精微詎可論孤忠天未棄尚合辱垂恩

路人有棄其子者因作是詩予時奉使湖外

彼呱呱者其孰棄之彼嫫嫫者其孰收之彼禽何知能字其鷦飛前則顧飢啄則呼孰謂斯人禽之不如彼雛之微皆得所依婉婉其音婆娑其衣孰謂斯人乃獨無

歸我號斯言以告採詩

和君時弟韻

流火退縮金盛強郊原日夜生寒涼梨垂栗皺橙柚香
田家笑語炊黃粱山水秀徹搖秋光重巖細菊斑斑黃
萬象呈露無遜藏時和歲豐辰亦良脂車與子游上方
吐論縱橫氣軒昂書帙羅列圖畫張睥睨孔孟窺虞唐
偃息道與緣禪床冉冉定看移星霜

一云登遂高
遠窮忽荒

不寐

吾行不能休中夜或不寐悠悠此時心往返徧萬類鰥魚固不瞑夢蝶亦無事紛紛爾何為百慮終一致

和叔宜弟

悠悠白雲飛戚戚感我情白雲行四方願我豈憚行投袂起香水荷擔指宜城所懷再踰秋計以頃刻成遠裝有書帙貧囊無金羸馬羸半徒步僕瘦復兼程天寒雪頻飛山阻路少平林端虎豹跡驛後豺狼聲我行有所懷雖壯如孩嬰入門旅愁破侍席春風生丁寧道懷感

惻怛一坐傾我今授汝記汝當以孝名孝能事其親榮
亦及乃兄乃兄久衰矣山川倦遐征歸與治爾田我歸
耦而耕

又

淚痕如雨欲垂垂知汝心誠繫綵衣江外若逢鴻雁過
時將音問寄庭幃

答張知常

曰歸去上鳳凰臺已見雲中鳴雁來攜酒幾時窺北海

采蘭三月去南陔山間鼠竊不為盜屋上鶴巢無妄災
但喜朝廷容正直更須郡守擇賢才

今年夏南陽多盜
繼有水災來詩及

之故
也

又

兩鬢蕭條今更衰茱萸祇似去年時甘從彭澤淵明醉
未肯牛山丘據悲泛菊想公多樂事及瓜如我有歸期
須穿畧約行松徑尚見芙蓉出槿籬

游西山

我少及長從公游我今老矣公白頭淵明彭澤不歸去
太史周南方滯留愛山興與精神聚形骸自笑縻珪組
欲騎馬去陟彼硯空羨鴻飛在于渚西山第一列洞天
別有日月無歲年洪崖已成丹竈藥瑤池每賦白雲篇
嘒嘒蟬噪竹枝露斑斑豹宿顛崖霧伯兮伯兮歸勿遽
人間旱歲須霖雨秋雨辛勤開菊花春風取次生蘭芽
我雖調公不敢易龍駒會去超胡沙

愛山樓歌

山隆然兮為屏樓縹緲兮浮空朝陽起兮輝輝白雲宿
兮溶溶喬木兮陰陰泉飛兮瓏瓏花香兮春雨鶴唳兮
秋風企望焉兮徜徉橫四海兮無窮氣飄浮兮欲仙嗟
勢利兮樊籠歸去來兮何為從公游兮山之中

和彥衡直講

日隱天北角月飛海東頭清暉到堂除轉覺夜氣幽睥
睨天地間無物矣為憂

二

是身如芭蕉況復身外名至人本無心肯為寵辱驚

三

風隨明月來終夜共清白先生靜無語獨看庭前栢冠
帶褫客衣詩書倦塵跡好風此時來應與君相識

四

照月槐影碎吹風栢聲繁悠悠此時心可樂不可言

使北有懷

長年日戲老萊衣不忍此身終日違今日馬頭燕北去

不堪頻望白雲飛
白雲汝飛去何許
悠悠會到江南路
朔風吹淚灑大河
直與波瀾競東注

蘆花

六言

風起蘆花散雪紛紛
故着枯槎曉日矇矓
照處十分認作梅花

沙柳

沙陀祇見塵土柳
色如逢故人憶著
千條萬葉金明馳
道青春

韓氏周宣王時為侯嘗入覲而歸顯父餞之尹

吉甫作誦今司空康國公既老元祐丁卯朝

京師戊辰春還許天子賜燕某賦是詩

在昔韓侯受命有周紹嗣禹功以續祖考韓侯入覲元
衮介圭有淑其旆韓侯歸止顯父是餞邊豆有踐奏鼓
衍衍韓侯燕喜既多受祉施于子孫為宋柄臣有子且
賢長則上公亦似前人有赫厥庸公老許田載見式時
朝有大疑公為耆龜公去不留天子是思薄言維之禩

旒有輝都人咸喜祝之千歲國有元老邦家是賴康公
之德寅亮孔碩利澤在民功在社稷孰能詩之以繼韓
奕誕發其聲施于罔極

舟中偶言

聯句

水聚即為漚漚散還為水某
祇這聚散中便是真如理

瑛首座

和瑛師

去來的的然莫道無來去烟蘿寶峰境風月清源路雨

漲沒滄洲雲歸出孤嶼風便水亦便非訟亦非訴

是時師自

豐城歸洪州而水便予按廬陵而風亦便故其詞如此

題本覺庵

本覺非今覺今覺如本覺悟得本覺時非覺非非覺

鄱陽集卷三